



*Selasa, 23 April 2024*  
**Ogen: 1 Tim 4:12-16**



**"Idah Kalak Kemajunndu"**



**K**erina kalak ngidah kemajunndu. Kalimat enda ngajuk kita lako banci jadi usihen si mehuli nandangi jelma si enterem. Kemajun sini maksud e me rukur alu mehuli, ngukurken keperluan enterem jelma, cara pandang si positif bage pe tentuna kemajun i bas erkiniteken.

Timotius e me anak rohani Rasul Paulus. Ia nguda denga. Biasana kalak nguda banci ikataken perukurena kurang dewasa bage pe cara berpikiran lenga bo payo (kekanak-kanakan); pemikiran si kekanak-kanaken baci mabai perubaten i tengah-tengah persadan; erkiteken si e Rasul Paulus mereken nasehat man Timotius arah ogen paksa tenengta wari enda. Piga-piga nasehat si ikataken Paulus e me : jadilah usihen i bas pengerana, i bas lagu langkah, i bas nehken kekelengen, bage pe i bas erkiniteken. Ndemi pusuh ras pikiren alu ngoge Kata Dibata i bas paksa si lit; makeken pemere Dibata alu payo; jaga diri ras jaga kerna pengajaren. Si enda kerina ikataken Rasul Paulus man anak rohanina gelah i idah kalak kerna kemajun si lit i bas diri Timotius. Pengajaren enda i sehken gelah jadi inget-inget man Timotius uga arusna jadi persuruhan Jesus Kristus si mehuli ras ertanggung jabap nandangi kai si idahikenna. Rasul Paulus nehken pengajaren enda erkiteken lit turah pengajaren si papak i tengah-tengah perpulungen i ja Timotius erdahin.

Kemajun si perlu si tuduhkan la terjeng kemajun i bas bidang secular/doni tapi kemajun erkiniteken. Moria si kinitekenna paguh teridah arah perbahanen, pengerana ras pendahinna. Hubungan si mehuli ras kerina teman, ngasup ngaloken teman si la bagi ukurna. Lanai terjeng dirina ngenca iukurina, enggo ngasup ngukuri kiniulin man kalak sideban. Tetap icidahkenna perbahanen si mehuli man ise pe. Teridah min kemajun kiniteken moria, gelah enterem kalak tek man Tuhan. Cidahkenlah kemajun kiniteken aminna pe kita nguda denga entahna nggo metua. Idah kalak min maka moria GBKP jadi moria si tangguh aminna gia melala perbeben si nderpa geluhta.

*“Kemajun kiniteken maba kejuah-juahen”*